

40/10

ZAKON

O IZMJENAMA I DOPUNAMA ZAKONA O PORESKOJ UPRAVI FEDERACIJE BOSNE I HERCEGOVINE

Član 1.

U Zakonu o Poreskoj upravi Federacije Bosne i Hercegovine ("Službene novine Federacije BiH, br. 33/02, 28/04 i 57/09), u članu 1. u stavu 1., iza riječi: "poreskih zakona" stavlja se zapeta i dodaju riječi: "Zakona o jedinstvenom sistemu registracije, kontrole i naplate doprinosa".

Stav 2. mijenja se i glasi:

"Ovaj zakon se odnosi na sprovođenje i izvršavanje aktivnosti iz oblasti svih vrsta federalnih, kantonalnih, gradskih i opštinskih poreza, doprinosa, taksi, posebnih naknada, članarina turističkih zajednica, članarina obrtničkih komora i novčanih i kazni za Poreske prekršaje."

Iza stava 2. dodaju se st. 3., 4., 5. i 6. koji glase:

"Pod taksama u smislu stava 2. ovog člana podrazumijevaju se taksa na istaknutu firmu i taksa za držanje aparata za igre na sreću i zabavne igre."

Pod posebnim naknadama u smislu stava 2. ovog člana podrazumijevaju se opšta vodna naknada, naknada za korišćenje opšte korisnih funkcija šume i posebna naknada za zaštitu od prirodnih i drugih nesreća.

Pod članarinama turističkih zajednica, u smislu stava 2. ovog člana, podrazumijevaju se članarine koje su dužni plaćati pravna i fizička lica i fizička lica (samostalni preduzetnici) u određenom procentu od ostvarenog ukupnog prihoda ostvarenog obavljanjem određene djelatnosti utvrđene Uredbom o članarinama turističkim zajednicama.

Pod članarinom obrtničkih komora, u smislu stava 2. ovog člana podrazumijeva se članarina koju su dužni plaćati obrtnici i lica koja obavljaju srodne djelatnosti u određenom procentu utvrđenom Pravilnikom o visini članarine, njenoj raspodjeli između udruženja obrtnika i udruženja lica koja obavljaju srodne djelatnosti, obrtničkih komora kantona i Obrtničke komore Federacije Bosne i Hercegovine."

Član 2.

Član 3. u stavu 1. tačka (1) mijenja se i glasi:

" (1) Porezi, doprinosi, takse, posebne naknade, članarine i novčane kazne

- Porez je novčani iznos koji je poreski obveznik dužan plaćati buxetu u skladu sa poreskim zakonima,
- Doprinos je novčani iznos koji je poreski obveznik dužan plaćati vanbuxetskim fondovima u skladu sa propisima koji regulišu te obaveze,
- Takse su novčane obaveze koje je poreski obveznik dužan plaćati u skladu sa zakonima kojima se regulišu takse na istaknutu firmu i takse na aparate za igre na sreću i zabavne igre,
- Posebne naknade su novčani iznosi koje su dužni plaćati poreski obveznici u skladu sa čl. 169. i 170. Zakona o vodama, članom 60. stav 1. tačka a) Zakona o šumama i u skladu sa članom 180. Zakona o zaštiti i spašavanju ljudi i materijalnih dobara od prirodnih drugih nesreća,
- Članarine turističkih zajednica su novčane obaveze koje su dužni plaćati poreski obveznici u skladu sa Uredbom o članarinama u turističkim zajednicama,
- Članarine obrtničkih komora su novčane obaveze koji su dužni plaćati članovi obrtničke komore u skladu sa Zakonom o obrtu i srodnim djelatnostima,
- Novčane kazne su novčani iznosi koji su evidentirani u registru novčanih kazni po poreskim prekršajima i koje se naplaćuju u postupku prinudne naplate."

U stavu 1. tačka (4) mijenja se i glasi:

" (4) Poreska tajna su sve informacije ili podaci o poreskom obvezniku kojima raspolažu poreski organi, izuzev:

- informacija i podataka za koje poreski obveznik u pisanom obliku izjavi da se ne smatraju poreskom tajnom;
- informacija i podataka datih u takvom obliku da se ne mogu povezati sa pojedinačnim poreskim obveznikom ili ga se na drugi način ne može identifikovati;
- podataka o naplati poreza koji se, prema odredbama ovog zakona, javno objavljuju.

Poreske informacije i podaci koji se smatraju poreskom tajnom mogu se dati:

- organima nadležnim za preduzimanje mjera i aktivnosti sa ciljem utvrđivanja poreskih obaveza, odgovornosti za Poreske prekršaje i poreska krivična djela;
- stranim poreskim vlastima u skladu sa međunarodnim ugovorima i drugim licima uz pisani pristanak poreskog obveznika."

U stavu 1. tačka (7), iza zagrada od riječi "OOPP" umjesto zapete stavlja se tačka, a ostali tekst se briše.

U stavu 1. tačka (9), riječ "radnik", zamjenjuje se riječju "zaposlenik".

Član 3.

U članu 4. stav 2. mijenja se i glasi:

"Poreskom upravom rukovodi direktor Poreske uprave (u daljnjem tekstu: direktor). Direktor ima zamjenika. Direktora i zamjenika direktora imenuje Vlada Federacije, na prijedlog federalnog ministra finansija (u daljnjem tekstu: ministar) na period od četiri godine sa mogućnošću novog imenovanja."

U stavu 3., prva rečenica se mijenja i glasi:

"Poreska uprava je organizovana na dva nivoa i to na nivou Središnjeg ureda i nivou kantonalnih poreskih ureda sa pripadajućim poreskim ispostavama".

Stav 5. mijenja se i glasi:

"Direktor, uz saglasnost ministra, a po sprovedenoj proceduri utvrđenoj u poglavlju IV Zakona o državnoj službi u Federaciji Bosne i Hercegovine ("Službene novine Federacije BiH, br. 29/03, 39/04, 54/04, 67/05 i 8/06), postavlja i razrješava rukovodioce sektora unutar Središnjeg ureda, rukovodioce kantonalnih poreskih ureda i šefove poreskih ispostava."

Stav 6. briše se.

Član 4.

U članu 5. u st. 3. i 4. riječi: "Na zahtjev Poreske uprave, Carinska uprava će joj "zamjenjuju se riječima: "U cilju međusobne saradnje, Uprava za indirektno oporezivanje će Poreskoj upravi,".

Iza stava 6. dodaje se novi stav 7. koji glasi:

"Poreska uprava dužna je razmjenjivati informacije sa odgovarajućim organima u Republici Srpskoj i Brčko Distriktu, u cilju većeg poštivanja poreskih zakona oba entiteta i Distrikta."

Dosadašnji stav 7. koji postaje stav 8., mijenja se i glasi:

"Poreska uprava i Uprava za indirektno oporezivanje dužne su koordinisati aktivnosti i obostrano razmjenjivati informacije sa odgovarajućim organima u Republici Srpskoj i Brčko Distriktu u cilju većeg poštivanja poreskih zakona oba entiteta i Distrikta."

Član 5.

U članu 7. u stavu 1., riječi: "Poreska uprava i njeni radnici" zamjenjuju se riječju "zaposlenici", a riječi: "imaće" riječju "imaju".

U stavu 1. u alineji 14. riječi: "vode postupak i izriču kazne" zamjenjuju se riječima: "izdaju prekršajne naloge".

U stavu 1., u alineji 18. riječi: "šezdeset (60)" zamjenjuju se riječima: "stotinudvadeset (120)".

Stav 2. mijenja se i glasi:

"Zaposlenicima poreskog organa nije dozvoljeno da budu u organima političkih stranaka, niti da budu u zakonodavnoj vlasti na bilo kojem nivou. "

Član 6.

U članu 9., u stavu 1. riječ "Radnici" zamjenjuje se riječju "Zaposlenici".

Član 7.

U članu 10. u st. 1. i 2. riječ "Radnici" zamjenjuje se riječju "Zaposlenici".

U stavu 2., iza riječi: "Poreskoj upravi" stavlja se tačka, a riječi: "ili poreskom obvezniku", brišu se.

Iza stava 2. dodaje se stav 3. koji glasi:

"Poreska uprava Federacije Bosne i Hercegovine je organ od značaja za javnu bezbjednost."

Član 8.

Iza člana 12. dodaje se novi član 12a., koji glasi:

" 12a.

Na prijedlog ministra, Vlada Federacije može donijeti odluku kojom će utvrditi pravo zaposlenika Poreske uprave koji rade na poslovima kod kojih postoje posebni uslovi rada, na poseban dodatak u visini do 20% od osnovne plate.

Odlukom iz stava 1. ovog člana, utvrdiće se poslovi kod kojih postoje posebni uslovi rada i procenat posebnog dodatka za te poslove."

Član 9.

Iza člana 15. dodaje se novi član 15a., koji glasi:

"15a.

Identifikacioni broj dodijeljen poreskom obvezniku oduzeće se u sljedećim slučajevima:

1. ako se utvrdi da je identifikacioni broj dodijeljen bez podnošenja propisane dokumentacije ili ako je lažna dokumentacija, odnosno lažne informacije korišćene u postupku dodijele identifikacionog broja,
2. ako je nakon izdavanja identifikacionog broja zakonodavac propisao druge uslove za poresku registraciju i identifikaciju poreskog obveznika, a poreski obveznik ne postupi u skladu sa izmjenjenom zakonskom regulativom,

3. ako nadležni sud utvrdi da je upis u sudski registar bio nedopustiv ili je naknadno postao nedopustiv,

4. u drugim slučajevima u kojima se utvrdi da je dodjela identifikacionog broja bila nedopustiva ili je naknadno postala nedopustiva.

Postupak oduzimanja identifikacionog broja sprovodi se na zahtjev lica koje ima pravni interes ili po službenoj dužnosti, u skladu sa odredbama upravnog postupka. Postupak sprovodi organizaciona jedinica Poreske uprave koja je i dodijelila identifikacioni broj poreskom obvezniku."

Član 10.

U članu 16., u stavu 3, iza riječi: "dostavlja poreskom organu rješenje o sudskoj registraciji sa prilogima" dodaju se riječi: "i izvod iz sudskog registra koji ne može biti stariji od trideset (30) dana od dana izdavanja."

Član 11.

U članu 18., iza stava 2. dodaje se stav 3., koji glasi:

"Organ uprave ili drugi nadležni organ koji vodi evidenciju o imovini i upisuje promjene o vlasništvu nad imovinom obavještava nadležni Poreski ured o svim promjenama u roku od pet radnih dana od dana takve upisane promjene kod subjekta nad čijom imovinom je Poreska uprava upisala zakonsku hipoteku."

Član 12.

U članu 20., u stavu 6. u četvrtom redu riječi: "na floppy disketi" zamjenjuju se riječima: "elektronskim putem".

U stavu 7., na kraju prve rečenice, umjesto tačke upisuje se zapeta i dodaju sljedeće riječi: "a ukoliko se radi o prijavi podnesenoj elektronskim putem, prijava se potpisuje u skladu sa Zakonom o elektronskom potpisu."

Član 13.

U članu 22. iza stava 4. dodaje se stav 5., koji glasi:

"Poreska uprava ima ovlaštenje izmijeniti poresku prijavu podnesenu od poreskog obveznika ukoliko utvrdi da poreska prijava nije ispravno podnesena ili ne sadrži tačne podatke. Izmjenu Poreske prijave Poreska uprava može izvršiti tek po isteku roka iz stava 4. ovog člana i po proceduri propisanoj ovim zakonom."

Član 14.

U članu 27., stav 1. mijenja se i glasi:

"Poreska obaveza je obaveza poreskog obveznika da plati porez, doprinose, takse i novčane kazne, uključujući i pripadajuće kamate, u skladu sa poreskim zakonima i zakonima kojima se uređuju pitanja doprinosa i odnosnih taksi i novčanih kazni."

Član 15.

U članu 28. stav 1., u drugom redu iza riječi "dužno" dodaju se riječi: "obustaviti i", a u petom redu iza riječi "kada" dodaje se riječ "je", a u šestom redu iza riječi "preduzetnik" riječ "naplati", briše se, a dodaju se riječi: "bilo dužno obustaviti i naplatiti".

Član 16.

U članu 29. stavu 1., alineji 1., iza riječi "direktor" dodaju se riječi: "ili osnivač".

Član 17.

Član 36. mijenja se i glasi:

"Izmirenje Poreske obaveze podrazumijeva plaćanje ukupnog iznosa poreza, doprinosa, taksi i novčanih kazni, uključujući i pripadajuće kamate.

Plaćanje poreza obavlja se u iznosu i rokovima u skladu sa poreskim zakonima.

Plaćanje doprinosa obavlja se u skladu sa odredbama Zakona o doprinosima.

Plaćanje takse obavlja se u gotovu ili računom u skladu sa propisima kojima su regulisane takse.

Plaćanje novčanih kazni koje su evidentirane u registru novčanih kazni i koje se naplaćuju u postupku prinudne naplate obavlja se u skladu sa odredbama poglavlja XI Zakona.

Plaćanje obaveza iz st. 2. do 5. ovog člana izvršava se putem OOPP na propisane račune u zakonskom sredstvu plaćanja u Bosni i Hercegovini."

Član 18.

U članu 40. stav 3. mijenja se i glasi:

" Razrez se poništava ili mijenja samo ako rukovodilac nadležnog poreskog ureda odredi da se razrez poništava ili mijenja ili prema presudi nadležnog suda. Ova pravila se neće primijeniti ako se razrez mijenja zbog izmjene Poreske prijave od poreskog obveznika."

Član 19.

U članu 43. stav 3. mijenja se i glasi:

"Nakon što poreskom obvezniku bude uručen nalog za plaćanje u skladu sa članom 3. stav 1. tačka (12) Zakona, i ako poreska obaveza ostane neplaćena, rukovodilac nadležnog poreskog ureda donosi rješenje o pokretanju postupka prinudne naplate, a to rješenje se dostavlja poreskom obvezniku prije preduzimanja konkretnih mjera prinudne naplate."

U stavu 5. u alineji 4. iznos "250,00 KM " zamjenjuje se iznosom "300,00 KM".

Član 20.

U članu 45. stavu 1., u alineji 1., iza riječi "trošak" dodaje se riječ "prinudne".

Član 21.

U članu 46. u stavu 2. iza riječi "obvezniku" umjesto tačke stavlja se zapeta i dodaju riječi: "u skladu sa članom 3. tačka (12) Zakona".

Član 22.

U članu 47. u stavu 1. u alineji 5. tačka 2., mijenja se i glasi:

" 2. ne postoji obračun ili postoje greške u obračunu kamate na zakašnjelo plaćanje, ili "

U stavu 2. riječ "dostavljeno" zamjenjuje se riječju "uručeno" i iza riječi "obvezniku" dodaju se riječi: " u skladu sa članom 3. tačka (12) Zakona".

Član 23.

U članu 48., iza stava 1. dodaje se novi stav 2. koji glasi:

" Ukoliko je rješenje o obustavi doneseno iz razloga što je istekao period u kojem je poreska obaveza naplativa (član 47., stav 1., alineja 1.), u istom rješenju će se odrediti da se poništavaju preduzete radnje u postupku naplate i da se poništava izvršeni razrez tih poreskih obaveza."

Dosadašnji stav 2. postaje stav 3.

Član 24.

U članu 50. u stavu 1. u četvrtom redu riječ "svu" briše se, a u petom redu iza riječi "obveznika" dodaju se riječi: "u visini dvostrukog iznosa duga,".

Iza stava 1. dodaje se novi stav 2. koji glasi:

"Konkretnu imovinu i imovinska prava na kojima se upisuje zakonska hipoteka u visini dvostrukog iznosa duga određuje Poreska uprava nakon pribavljanja podataka o imovini i imovinskim pravima poreskog obveznika i nakon procjene vrijednosti konkretne imovine i imovinskih prava od ovlašćenog sudskog vještaka, a koju obezbjeđuje poreski obveznik. Ako poreski obveznik nema imovine i imovinskih prava u vrijednosti koja je jednaka dvostrukom iznosu duga, zakonska hipoteka se upisuje na svu imovinu i imovinska prava poreskog obveznika."

St. 2., 3. i .4 , postaju st. 3., 4. i 5.

Dosadašnji stav 2. , koji postaje stav 3., mijenja se i glasi:

"Zakonska hipoteka iz stava 1. ovog člana, traje do izmirenja Poreske obaveze ili poništenja razreza poreza"

U stavu 4. koji postaje stav 5. riječ " svu ", briše se.

Iza stava 4., koji postaje stav 5., dodaje se novi stav 6. koji glasi:

"Poreskom obvezniku, čija je sva imovina i imovinska prava ili njihov dio, postala predmetom zakonske hipoteke zbog poreskog duga, koji, u cilju izmirenja tog duga, hoće da proda svoju cjelokupnu imovinu i imovinska prava ili njihov dio, Poreska uprava će dozvoliti prodaju istih, ukoliko kupac te imovine i imovinskih prava izvrši uplatu cijene te imovine i imovinskih prava, dogovorene između poreskog obveznika - dužnika i kupca, na odgovarajuće račune javnih prihoda. Cijena koju dogovore prodavac - dužnik i kupac mora biti zasnovana na procjeni vrijednosti predmetne imovine i imovinskih prava sačinjenoj od sudskog vještaka odgovarajuće struke. "

Dosadašnji stav 5. postaje stav 7.

Stav 5. koji postaje stav 7., mijenja se i glasi:

"Nadležni poreski ured je dužan u roku od dva radna dana nakon izmirenja odgovarajuće Poreske obaveze, odnosno nakon uplate sredstava ostvarenih prodajom dužnikove imovine i imovinskih prava na račune javnih prihoda bilo da je tu uplatu izvršio sam poreski obveznik - dužnik ili kupac sve ili dijela imovine i imovinskih prava dužnika, te u skladu sa utvrđenim procedurama, izvršiti brisanje hipoteke u istom uredu (uredima) u kojem su bila i evidentirana."

Član 25.

U članu 51., u stavu 6., riječ "dostave" zamjenjuje se riječju "uručenja".

Član 26.

U članu 54., u stavu 11. riječi: "poresku obavezu i troškove" zamjenjuju se riječima: "troškove postupka prinudne naplate, kamate i poresku obavezu."

Član 27.

U članu 55., iza stava 1. dodaje se novi stav 2. koji glasi:

"Način i postupak davanja i preuzimanja zaplijenjene imovine iz stava 1. ovog člana propisat će Vlada Federacije podzakonskim aktom u roku od šezdeset (60) dana od dana stupanja na snagu ovog zakona."

Dosadašnji stav 2. postaje stav 3.

Član 28.

U članu 57., u stavu 1., iza riječi "obaveze" dodaju se riječi: " u postupku prinudne naplate".

Član 29.

U članu 58., u stavu 4., riječ "direktor" zamjenjuje se riječima: "Federalno ministarstvo finansija".

Član 30.

U članu 63., u stavu 3., u alineji 3., riječi: " posebne takse " zamjenjuju se riječju " kamate".

Član 31.

U članu 64., u stavu 1., riječi: "drugih radnika" zamjenjuju se riječju "zaposlenika" , a umjesto tačke na kraju teksta stavlja se zapeta i dodaju riječi: " u skladu sa zakonom".

Član 32.

U članu 66. stav 5. riječi: "drugačije ne odluči direktor ili, u slučaju odsustva direktora, njegov zamjenik" zamjenjuju se riječima: "postoji osnov za obnovu postupka".

Stav 7. mijenja se i glasi:

"Ako prilikom kontrole zaposlenik Poreske uprave otkrije da poreski obveznik posluje nezakonito, tada će ovo predstavljati osnov za privremeno obustavljanje poslovnih aktivnosti poreskog obveznika pečaćenjem njegovih poslovnih prostorija. Nezakonito poslovanje u smislu ovog zakona uključuje poslovanje bez dozvole, neprijavljivanje zaposlenika, poslovanje sa robom kojoj se ne zna porijeklo, neevidentiranje prometa u skladu sa poreskim zakonima i onemogućavanje ovlaštenim zaposlenicima da u skladu sa ovim zakonom izvrše inspekcijски nadzor ili neku drugu zakonom propisanu radnju."

Član 33.

U članu 67., u stavu 1., riječi: " kao dokaze", brišu se.

Stav 2. briše se.

Član 34.

U članu 71., u stavu 1., na kraju teksta umjesto tačke stavlja se zapeta i dodaju riječi: "vodeći računa o pripadnosti prihoda".

Član 35.

U nazivu poglavlja XV, riječ "ZASTARE" zamjenjuje se riječima: " I ZASTARA "

Član 36.

U članu 73., u stavu 1., alineja 1., mijenja se i glasi:

" - za porez i kaznu koja se odnosi na taj porez u roku od pet godina nakon što je poreska prijava za taj porez podnesena ili nakon isteka zakonskog roka za podnošenje Poreske prijave, računajući od dana koji je kasnije nastupio".

U stavu 2., alineja 1., mijenja se i glasi:

" - za porez ili kaznu koja se odnosi na taj porez, ako je poreska prijava za taj porez lažna ili ako poreska prijava za taj porez nije podnesena".

Član 37.

U članu 74. u stavu 1., alineja 1. mijenja se i glasi:

" - u roku od pet (5) godina nakon što je prijava za taj porez podnesena od poreskog obveznika, ili "

U stavu 1., iza alineje 1. dodaje se nova alineja 2. koja glasi:

" - u roku od pet (5) godina od dana izvršnosti Poreske obaveze koju je utvrdila Poreska uprava podnošenjem prijave u ime poreskog obveznika ili rješenjem o dodatno utvrđenim poreskim obavezama.".

Dosadašnja alineja 2. postaje alineja 3.

Član 38.

Iza člana 74. dodaje se novi član 74a., koji glasi:

" Član 74a.

Zastarijevanje prava na razrez i prava na naplatu poreza, kamata, troškova prinudne naplate i novčanih kazni prekida se svakom službenom radnjom nadležnog poreskog organa koja je preduzeta u cilju razreza i naplate poreza.

Poslije svakog prekida zastarijevanje počinje teći iznova, a vrijeme koje je isteklo prije prekida ne računa se u zakonom određeni rok za zastarjelost.".

Član 39.

U članu 76. st. 2. i 3. se mijenjaju i glase:

"@alba se neposredno predaje ili šalje poštom organu koji je donio prvostepeno rješenje u roku od osam (8) dana od dana prijema prvostepenog rješenja.

Kad prvostepeni organ nađe da je podnesena žalba dopuštena, pravovremena i izjavljena od ovlašćenog lica, a pobijano rješenje nije, u skladu sa zakonom, zamijenio novim rješenjem, dužan je bez odgađanja, a najkasnije u roku od osam (8) dana od dana prijema žalbe, poslati žalbu Ministarstvu na rješavanje."

Iza stava 3. dodaje se novi stav 4. koji glasi:

"Ministarstvo, kao drugostepeni organ, rješava po žalbi u roku od trideset (30) dana od dana prijema žalbe od prvostepenog organa.".

Dosadašnji stav 4. postaje stav 5.

Član 40.

Član 77., briše se.

Član 41.

U članu 78. u st. 1., 2. i 3. riječi: "Vrhovnom sudu Federacije" zamjenjuju se riječima: " nadležnom sudu u Federaciji. "

Član 42.

Član 81. mijenja se i glasi:

"Pravno lice koje prekrši bilo koju proceduru registrovanja kod Poreske uprave prema Poglavlju VI Zakona ili koje se ne registruje na vrijeme biće kažnjeno novčanom kaznom u iznosu od 1.000,00 KM do 10.000,00 KM.

Fizičko lice koje prekrši bilo koju proceduru registracije kod Poreske uprave prema Poglavlju VI Zakona ili koje se ne registruje na vrijeme biće kažnjeno novčanom kaznom u iznosu od 200,00 KM do 2.000,00 KM."

Član 43.

Član 84. mijenja se i glasi:

"Pravno lice koje ne podnese poresku prijavu Poreskoj upravi na način propisan ovim ili bilo kojim poreskim zakonom Federacije, biće kažnjeno novčanom kaznom u iznosu od 2.000,00 KM do 20.000,00 KM.

Fizičko lice koje ne podnese poresku prijavu Poreskoj upravi na način propisan ovim ili bilo kojim poreskim zakonom Federacije, biće kažnjeno novčanom kaznom u iznosu od 300,00 KM do 3.000,00 KM.

Za svaku prijavu koju mora sačiniti Poreska uprava u ime poreskog obveznika, propisuje se novčana kazna u iznosu od 500,00 KM do 50.000,00 KM."

Član 44.

Član 88. mijenja se i glasi:

"Pravno lice koje se ne pridržava procedura za vođenje knjiga i evidencija koje je dužno voditi u skladu sa poreskim zakonima i koje ne dostavi Poreskoj upravi Poreske isprave u rokovima propisanim poreskim zakonima, biće kažnjeno novčanom kaznom u iznosu od 2.000,00 KM do 20.000,00 KM.

Fizičko lice koje se ne pridržava procedura za vođenje knjiga i evidencija koje je dužno voditi u skladu sa poreskim zakonima i koje ne dostavi Poreskoj upravi Poreske isprave u rokovima propisanim poreskim zakonima, biće kažnjeno novčanom kaznom u iznosu od 200,00 KM do 2.000,00 KM."

Član 45.

Iza člana 94. dodaju se čl. 94a. i 94b., koji glase:

" Član 94 a.

Pravno lice, koje u datom roku ne otkloni nedostatke koje mu je rješenjem naložio poreski inspektor, biće kažnjeno novčanom kaznom u iznosu od 2.000,00 KM do 20.000,00 KM.

Fizičko lice, koje u datom roku ne otkloni nedostatke koje mu je rješenjem naložio poreski inspektor, biće kažnjeno novčanom kaznom u iznosu od 500,00 KM do 5.000,00 KM.

Član 94 b.

Pravno lice kod kojeg se utvrde nezakonitosti iz člana 66. Zakona biće kažnjeno novčanom kaznom u iznosu od 3.000,00 KM do 30.000,00 KM.

Fizičko lice kod kojeg se utvrde nezakonitosti iz člana 66. Zakona biće kažnjeno novčanom kaznom u iznosu od 500,00 KM do 5.000,00 KM."

Član 46.

Član 96. mijenja se i glasi:

"Poreska uprava je dužna, na zahtjev poreskih obveznika, davati mišljenja i odgovore na pitanja u vezi sa primjenom propisa kojim se regulišu porezi, doprinosi i takse, a za čiju naplatu i kontrolu je nadležna.

Način i postupak davanja mišljenja iz prethodnog stava propisaće ministar podzakonskim aktom u roku od šezdeset (60) dana od dana stupanja na snagu ovog zakona."

Član 47.

Zakonodavno - pravne komisije oba doma Parlamenta Federacije Bosne i Hercegovine utvrdiće prečišćeni tekst Zakona o Poreskoj upravi Federacije Bosne i Hercegovine.

Član 48.

Ovaj zakon stupa na snagu osmog dana od dana objavljivanja u "Službenim novinama Federacije BiH",

Predsjedavajući
Doma naroda
Parlamenta Federacije BiH
Stjepan Krešić, s. r.